



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

Tir Yimym

tiryimym@aolima

tir yimym

TAPAK 10

Akhil Gogoi-i MLA inyaksü tezüngzüktep agiogo

India-New Zealand WTC final atema terepranger 4000 melatsü


VOL. XVIII NO. 217 (ADOK 217) DIMAPUR

KÜPTOKNÜ (SATURDAY)

MONUPII (MAY) 22, 2021

₹ 5.00

DRDO-i COVID-19 antibody detection kit yangluogo



New Delhi, May 21, 2021 (Agencies): India nung COVID wara tembangdaksütsü atema lenmang balala bushitepa arudang Defence Research and Development Organisation (DRDO) indang laboratory ajanga 'DIPCOVAN' ta ser antibody detection-based kit ka yanglutetogo.

DRDO kübok Defence Institute of Physiology and Allied Sciences (DIPAS) ajanga iba DIPCOVAN kit yangluogo aser iba ajanga SARS-CoV-2 virus indang nucleocapsid (S&N) proteins kanga junga puteter.

Iba kit ya New Delhi nung aliba Vanguard Diagnostics Pvt

Ltd den yaritepa yangluogo.

Delhi nung aliba COVID designated hospital tem nungi shiranger 1,000 den timba indang sample tendanga iba Kit ya yanglu. Tesüiba küm ka tsüngda iba Kit indang batch 3 tashi tendanga aruogo, ta Press Information Bureau (PIB)-i metetdaksüogo.

April 2021 nung Indian Council of Medical Research (ICMR)-i antibody detection kit ya molunga agizük.

June 2021 tetenzüklen nungi Industry partner Vanguard Diagnostics Pvt. Ltd ajanga iba Kit ayoktsü aser test ka nung Rs 75 shi agitsü akok.

COVID-19 agi asür mang kinungertemi aremtsüla

Dimapur, May 21, 2021 (TYO): Nagaland Home Department-i Hokolbarnü District Task Force (DTF) ajak dang COVID-19 agi shiranga asürtem mang endokba indang SOPs aser tetuyubatem nenshia metetdaksüogo.

Nagaland nung COVID-19 agi shiranga asür timbaka State Disaster Response Force (SDRF) personnel ajanga dang anepalua endokba osang angazüker, ta Principal Secretary, Home R Ramkrishnan-i tanü DTF dangi shidi ka zülü.

Ajisüaka, NDRF/SDRF/Police-i kinunger mesüra nisung shingai COVID-19 agi asür mang tabeni marudang dang anepalutsüba SOPs nung lateta lir, ta pai ashi.

Shirangertem anepalua asüba mozü ki nung health care workers-i tasü mang merüktetba sülen kinunger ket nung agütsütsü ta SOPs lateta lir aser iba nung lendong kecha mali kechiyong mang jungjunga alepbangba den ang mozü agi merükteter agütsür, ta paisa metetdaksü.

"Mozü kidang health care workers-i tasü mang jungjunga leak proof plastic bag aser süngden nung enoktsü aser iba sülen mozü agi kanga junga merüktetba sülen ang staff mesüra kinunger ket nung agütsür. Anungji DTF ajaki iba tetuyuba sülen anidaksü metetdaksür" ta Principal Secretary, Home-isa ashi.

ULFA(I)-i Nagaland nung Ritul Saikia chiokogo

Guwahati, May 21, 2021 (Agencies): Hokolbarnü ULFA(I)-i ONGC nung mapa inyaker Ritul Saikia chiokogo.

Nagaland kübok Mon district nung India-Myanmar arrtsü anasa Changsa Basti nung Ritul Saikia chiok ta osang ajanga ashi.

April 21, 2021 nü Sivasagar district nung ULFA(I) telungpurtemi ONGC nung mapa inyaker nisung 3 pur ao.

Par asem rongnungi nisung

ana- Mohini Mohan Gogoi aser Alakesh Saikia na April 24, 2021 nü Nagaland kübok Mon district nung Indian Army aser Nagaland Police ajanga kümzükka liasü. Ajisüaka, iba mapang parnoki Ritul Das meküzmüktet.

Tawa tu Assam chief minister Himanta Biswa Sarma-i Jorhat district kübok Titabor nung Ritul Saikia'er kinungertem den ajurutepa liasü.

Iba mapang sorkari Ritul

Black Fungus: India nung nisung 7,000 tema dak putetogo

AIIMS Director-i iba nungi jenbua alitsü inyakyim metetdaksür

New Delhi, May 21, 2021 (Agencies): India nung mucormycosis (black fungus) kanga puteter aser tang tashi nung nisung 7,000 dak iba tashidak adokba putetogo aser nisung 200 tema süogo.

Centre-i state aser Union Territory sorkartem dang mucormycosis (black fungus) ya Epidemic Diseases Act kübok notifiable disease ka ama züingoktsü tetuyuba agütsüogo.

COVID-19 agi shirangertem dak iba tashidak adoker aser taküm samatsür, ta Centre-i ashi.

Tang tashi nung nisung 7,250 dak mucormycosis putetogo aser iba ajanga nisung 219 süogo ta ketdangsürtemi ashi.

Covid ajanga adokdaksüba tashidak ya Maharashtra nung nisung timtiba dak putet aser parnok sülen Gujarat o Madhya Pradesh nung lir.

Assam nung May 18, 2021 nü black fungus agi shiranger mezüngbuba nisung puteta liasü.

Guwahati nung aliba nija mozü ki ka nung arishi küm 27 tain ka dak iba tashidak putet saka pa tasüngnepji süadok.

BLACK FUNGUS ATEMA AMPHOTERICIN-B MOZÜ AMSHIR:

Hokolbarnü Union Health Ministry-i black fungus agi kangshirtem anepaluba Amphotericin-B mozü yanglutsü atema company talila 5 nem license agütsüogo.

Parnoki July ita nungi ita shia mozü vials 1,11,000 yanglutsü, ta Union Health Ministry-i ashi.

State aser union territory aika nung mucormycosis agi kangshiba osangtem lir aser Amphotericin-B mozü agi meperir. Anungji, onoki tanga linüktem nungi anti-fungal drug bener arutsü lenmangtem bushiteper, ta health ministry-isa metetdaksü.

Mya ita tsüngda Amphotericin-B indang vials 3,63,000 bener arutsü aser ibaji züingsema tang atema linük nung vials 5,26,752 akümtsü, ta parnokisa ashi.

Maneni, June ita nunga vials 3,15,000 bener arutsü aser linük nung yangluba züingsema vials 5,70,114 akümtsü, ta parnokisa shisem.

COVID AGI SHIRANGERTEM DAK 'BLACK FUNGUS' NOKTANGTETSÜ:

Mucormycosis ajanga kangshir karbo tenük agi mangu kümogo aser kar teküm ajanga endoktsüsa aküm. India nung coronavirus wara tanabuba mapang iba tashidak yagi khuret tuluba bentsür aruogo.

Hokolbarnü All India Institute Of Medical Science (AIIMS) Director, Dr Randeep Guleria-i novel coronavirus puteta alitem dak black fungus noktangtsü atema inyakyim kar metetdaksüogo.

"Mucormycosis ya black fungus masü aser aibelena ajar. Blood supply shitak manguba ajanga teküp sentsü melenshir aser iba jagi tanak akümba agi black fungus ajarba dang lir" ta pai ashi.

"Mapang talangka steroids agia arur mesüra diabetes aketertem dak mucormycosis adoktsü akok. Iba yagi synuses, tenük aser mapang kar nungbo tekokok aser teni nung kongshir" ta Dr Randeep-isa shisem.

"Mezüngbuba nung shiranger indang sugar levels jungjunga reprangtsüla aser sugar level azüoktsüla. Type 2 diabetes ajanga shirangertem kanga kümdangtsüla" ta paisa metetdaksü.

"Covid agi shiranger nem steroids agütsütsü shia lir, mapang shia blood sugar tendangtsüla" ta AIIMS Director-i ashi.

"Steroids kanga kümdanga achitsüla aser medical supervision kübok dang steroid achitsüla. Maneni, mozü achiba mapang shitak amshitsü kanga tongtipang lir. Coronavirus agi tera dang shirang nunga nisungtemi steroids achir saka yamaji masütsüla" ta Dr Randeep-isa metetdaksü.

"Tesüiba mapang SARS wara adokdanga black fungus mesükba tashidak adokogo. Chiyungtsü tazü achiba ajanga black fungus adoker ta asübaaji tiyazü lir" ta paisa shisem.

COVID-19 Nagaland: Nisung 309 dak putet; 225 taneptsü angu & 13 asü

Kohima, May 21, 2021 (TYO): Hokolbarnü Nagaland nung COVID-19 agi shiranger nisung timtiba taneptsü nguogo. Tanü nisung 225 tashi taneptsü angu saka ano nisung 309 dak putetba ajanga COVID-19 puteter nisung ajak agi 19,593 kümogo.

"Tanü nisung 309 dak COVID-19 putet. Parnokji Dimapur nung nisung 122,

Kohima nung 113, Phek nung 22, Mokochung nung 15, Wokha nung 12, Zunheboto nung 11, Tuensang nung 9, Mon nung 4 aser Peren nung 1 lir" ta Health & Family Welfare Minister, S Pangnyu Phom-i metetdaksü.

"Maneni, tanü COVID-19 puteta alir nisung 225 taneptsü angu. Parnokji Kohima nung 78, Dimapur nung 75, Mon nung 43, Zunheboto nung 13, Wokha nung 8, Tuensang nung 4, Phek nung 3 aser Kiphire nung 1 lir" ta Pangnyu-isa ashi.

Nisung 19,593 rongnung 14,149 taneptsü nguogo aser tang nisung 4,588 anepaludar, ta paisa shisem.

Taküm March 19 nungbo COVID-19 nungi taneptsü angurji 97.98% liasü saka tanü 72.21% dang kümogo.

"Hokolbarnü COVID-19 puteta alir nisung 13 asüba züingsema tasür ajak agi 258 kümogo saka parnok 11 bo tanga

tashidak ajanga asü. Nagaland nung COVID-19 puteter nisung 598 tashi tanga state temi ogo," ta Minister Pangnyu-isa metetdaksü.

DIMAPUR NUNG TOTAL LOCKDOWN INDANG NENSHIR

Dimapur, May 21, 2021 (TYO): Dimapur district nung May 31, 2021 tashi Total Lockdown alitsü aser taoba mapang tetuyuba agütsüba ajak mapa küma inyaksü ta Deputy Commissioner, Rajesh Soundararajan, IAS-i tanü nenshia metetdaksüogo.

Iba tetuyuba alema inyakerterem Disaster Management Act 2005 aser IPC kübok merenshitsü, ta paisa ashi.

Maneni, Commissioner of Police Dimapur, Rothihu Tetso-ia tanga sangdong ka nung May 31, 2021 tashi Dimapur district nung garitem 'even-odd system' nung senzütsü nenshia metetdaksüogo.

NPCY puri mask angati lema agütsü



Congress Bhavan, Kohima nung May 21, 2021 nü face mask angati lema agütsüba sentong tenzükdang NPYC lenirtem aser NPCC tongti zülur Supongmeren Jamir nungertem külemi tangokba noksa ka yangi angur.

Kohima, Monupii/May 21 (TYO): India indang taoba Ato Kilonser Rajiv Gandhi asür küm 30 ajungba nungtem nung Nagaland Pradesh Youth Congress (NPYC) ajanga May 21, 2021 nü Kohima jila nung nüburttem nem mask angati lema agüja liasü.

Asür Gandhi nem akum agüja nüburttemi COVID-19 den raraba nung mask ya kanga

tongtipang ta angatetdakja, tashidak wara agi alima ajunga sünger lia mask angati lema agütsütsü sentong ya ayongzük, ta Nagaland Pradesh Congress Committee (NPCC) tongti zülur aser taoba MLA Supongmeren Jamir-i ashi.

NPCC tir K Therie-i district ajak nung Congress züngsem ajanga dang jeret-pereta alitsü

asür nüburttem nungdakba nung molungsoa yariteptsü aser district administration den yariteptsü totuyuba agütsü, ta pai ashi.

NPYC tir tassenba, Limayangba Lemtur den külem ketdangpurtemi mask ya jila telungzük nung lema agütsü aser ano Old MLA Hostel lemjem nung Traffic police tem nema mask amokja liasü.

NPF Phek Division & NPP ajanga Asür Itokhu Chopy mang ayimer

Kohima, Monupii/May 21 (TYO): NPF Dimapur Division nung tongti zülur (Adm), Itokhu Chopy ajungbena asüba atema mang ayimer, ta Naga People's Front (NPF) Phek Division ajanga sangdong ka nung ashi.

Pa asüba ajanga asen party nung tapok tulu adoktsü aser takoksa tulu lir, ta NPF Phek Division indang tir, Wepe Mekrisuh-i sangdong nung shia liasü.

Mangyimer kibong nem Tulusang Tsüngremi

tesuneptsüba agüjang ta sarasademtsür aser asür tanüla teti tatem maka tesunep nung anisüngzükjangma, ta sangdong ajangasa ashi.

Nübu tajung ana, taoba DMC züngsem Pukhavi Yeptho aser General Secretary (Adm) NPF Dimapur Division, Itokhu Chopy asüba osang angashia NPP Nagaland State kanga sasar, ta Dr. Andrew Aphoto Sema, NPP Nagaland tir ajanga sangdong ka nung metetdaksü.

Asen dangi iba ama takoksa bener arutsüba tejashi

lemsatsü atema temolungi o marur. Tena ya nübu tajung kaka liasü aser asen lokti ajungtsü atema kanga saksalema aser jeret-pereta inyaka liasü. Iba ama nükla tajung aliba lenir asüba ya atangchi nung takoksa ulura lir, ta sangdong ajanga ashi.

Mangyimer kibong, tembar, kinunger adianutem den asükhu lemsateper. Tsüngremi mangyimer molung nung anisüngzük aser sunepsüba agüjangma, ta kasa sangdong nung shia liasü.

NCSU tatong tir Ntsenthung Tungoe asüba mang ayimer

Dimapur, Monupii/May 21 (TYO): Naga Hospital Kohima nung May 21, 2021

nikongdang 1:30 ako nung NCSU tatong tir, Ntsenthung Tungoe ajungbena asüba atema Nagaland Contractors & Suppliers Union (NCSU) Head Office Kohima Nagaland

ajanga mangyim tejashi lemsateper, ta NCSU tir Pele

Khezhie aser tongti zülur John Kath nati sangdong ka nung ashi.

Pa anojungi asüba ajanga NCSU aser talisa Naga nunger asoshi lenir tajung ka samaogo, koba melentsü tamakoktsü asütsü, ta ashi.

Pa NCSU nung tatong tir ka ama 2006 nungi tanü tashi inyaka liasü. Pai tajungtiba

nung NCSU tenzükogo. Pa tongmelang, bendanga agütsür meranga inyakba aser ajemalur ka liasü, ta sangdong ajanga ashi.

NCSU-i mangyimer kibong den asükhu lemsateper aser Tulusang Tsüngremi asür tanüla tesunep nung anisüngzükjang ta sarasademtsür, ta sangdong ajangasa ashi.

NSCN/GPRN-i asükhu lemsatep

Dimapur, Monupii/May 21 (TYO): NSCN/GPRN indang Leacy, Vikato Chophi anojungi May 20, 2021 nü asüba atema Government of the People's Republic of Nagalim (GPRN) mang ayimer, ta MIP, NSCN/GPRN sangdong ka ajanga ashi.

Pa ya Sumi Region kübok Tizu Island yimtsüng nungi liasü aser Naga linük tenzükba wadang nung September 12,

2014 nung tenüng zülüoka liasü. Pai linük meimba molungsentsü nung tasünü tashi Naga lima tenzükogo. Pa asüba ajanga tawa adokba kanga jangja meteter aser iba tawa asüngtsü tasak asütsü, ta sangdong ajanga ashi.

Naga lima ajungtsü mechi pai anibelem mesasai shilem agiba atema pa tenüng Naga nunger puti otsü nung teti alitsü aser

Naga limai pa kodanga mamadoktsü.

NSCN/GPRN ajanga Asür Vikato Chophi'er kinungertem den asükhu lemsateper. Tsüngremi mangyimer kibong moajang aser tesuneptsüba agüjang ta sarasademter. Asür tanüla teti tatem maka tesunep nung anisüngzükjangma, ta NSCN/GPRN sangdong ajangasa ashi.

COVID-19 mechi Dimapur nung SBI branch ka shibanger aser ka lapoker

Dimapur, Monupii/May 21 (TYO): COVID-19 tashidak wara prokshia aoba aziöktsü mapa tem tajungtiba nung inyaksü mechi State Bank of India (SBI), Evening Branch, Dimapur ya iba osang sangdongba nungi tenzükga ghonda 48 atema shibangtsür, aser iba mapang bank ketdangsurtemi iba ki telungzük nung mürekmejuba meratem agitsü, ta Deputy Commissioner & Chariman, DDMA, Dimapur, Rajesh Soundararajan, IAS ajanga May 21, 2021 nü

sangdong ka nung metetdaksü. Iba totuyuba nung aibelener nem Disaster Management Act, 2005 kübok Section 51 aser IPC indang Section 188 kübok tapet temerenshi agütsütsü, ta sangdong ajanga ashi.

Maneni Deputy Commissioner & Chariman, DDMA, Dimapur, Rajesh Soundararajan, IAS ajangasa nung State bank of India (SBI), Old Market Branch, Kalibari Road, Dimapur lapoktsür, ta metetdaksüogo.

Shamator nung Sales Day agiogo



Shamator, Monupii/May 21, 2021 (TYO): Covid-19 dak sendakba tekümdangtsü meratem nung anidaka, Hokolbarnü (21.05.2021) Shamator Town nung Self Employed Women Association (SEWA) Shamator-i sales day ayongzük.

SEWA-i kidanger yimtsüngtem nung teyari agütsütsü nükjidong yur, item yimtsüng nung ayangertem pei pei lu nung züsentetba süngolemba, süngjanglijang aser

yimertem arem nung adokba chiyongtsü tem bendenba parnoki aliden aser iba sales day ayonga agiogo.

Secretary, SEWA Shamator Unit, Tsurila-i, Shamator telungtet nung teshimtet züngsem kar dang shishilembaba den Cash on Delivery aser Door to Door Step Services maparen nung dena inyakogo ta metetdaksü aser Shamator nung külem sensopurtemi telangzüba tajung agütsüogo, ta lai shisem.

Midland Panchayat Kohima-i asükhu lemsatep

Dimapur, Monupii/May 21 (TYO): All Kohima Municipal Ward Panchayat (AKMWP) tir, Neibulie Kiewhuo ajungbena May 21, 2021 nikonngdang 5:30 ako meta asüba aoshi kanga aoksar aser jashir, ta Midland Panchayat Kohima indang chairman, Kopelo Krome-i sangdong ka nung ashi.

Asür Neibulie Kiewhuo ya ochishir takum ka aser Kohima ajungtsü atema bendanga

agütsür inyakba nübu ka liasü. Pa asüba ajanga tawa adokba melentsü kanga tasak alitsü, ta sangdong ajanga ashi.

Tang mangyim tejashi mapang Tulusang Tsüngremi mangyimer kibong nem tesunep aser anisüng den tashi tasen agüjangma aser maneni asür tanüla teti tatem maka tesunep nung anisüngzükjang ta sarasademtsür, ta sangdong ajangasa ashi.

Security Forces temi AP nung NSCN (K-YA) züngsem ka apu

Dimapur, Monupii/May 21 (TYO): Security Forces temi police den lungjemer operation ka May 18, 2021 nü agiba mapang NSCN (K-YA) züngsem ka pua liasü.

Osang tejangja aruba ka nung ajemdaker Security Forces temi State Police den lungjemer operation ka agiba mapang NSCN (K-YA) züngsem ya

Longding District, Arunachal Pradesh kübok Pumao tesem nung apu. Iba nisungba tenüng nung taoba mapanga court nung ken o benoka lir.

Maneni mera balala agiyonga aotsü aser asüngdangyatsü asoshi pua alisang ya Longding Police Station nem agütsüogo, ta sangdong ka ajanga ashi.

Akhil Gogoi-i MLA inyaktsü tezüngzüktep agiogo



Tepuokdak yua aliba CAA activist Akhil Gogoi tanü MLA tezüngzüktep agitsü atema arundang agiba noksa angur. (Guwahati, May 21)

Guwahati, May 21, 2021

(Agencies): Hokolbarnü Sivasagar constituency nungi Akhil Gogoi-i Assam Legislative Assembly nung MLA inyaktsü tezüngzüktep agiogo.

Dispur nung Assam Assembly session mezüng session nung MLA temi tezüngzüktep agi.

Assam Assembly elections 2021 nung Akhil Gogoi-i Sivasagar menden nungi BJP candidate madak takok angu.

Pa ya Rajgor Dal president lir aser iba telok ya Krishak Mukti Sangram Samit (KMSS)-i pusema nungiter.

May 11 nü Special NIA

Court kati Akhil Gogoi nem Assam Assembly nung tezüngzüktep agitsü atema temelaba agütsü.

Gauhati Medical College Hospital (GMCH) nung pa indangindanga Assam Assembly-i anir ao.

Assembly-i aodang len tom nung security personnel-i pa dak tim mesüi kongshi ta tanü Gogoi-i tai tongloktsü.

"Iba ya MLA ka akhüm metsübuba lir. Sorkari MLA ka dak yamai inyakra, kecha masüba nisung ka dak kechi ataloktsü?" ta Akhil Gogoi-i asüngdang.

Sorkari ni tepsettsü akok

saka kü ola menembangtetsü, ta paisa ashi.

Tanü MLA temi Assam Governor Prof Jagdish Mukhi, pro-tem Speaker Phanibhushan Choudhury aser chief minister Himanta Biswa Sarma nunger tsüngdang tezüngzüktep agiogo.

May 10, 2021 nü Srimanta Sankardeva Kalakshetra nung chief minister Himanta Biswa Sarma-i anir minister 13-i tezüngzüktep agia liasü.

Tanü MLA 90-i COVID inyakyim ama Assembly nung tezüngzüktep agiogo aser Honibarnü ano MLA 36-i tezüngzüktep agitsü.

Tripura sorkari Corona Crisis Management Groups tenteter

Agartala, May 21, 2021

(Agencies): Tripura nung COVID-19 tensa aziüktsü atema state sorkari "Corona Crisis Management Groups" tentetogo.

Tripura Chief Secretary aser State Executive Committee chairman Manoj Kumar-i

state-level, district level, block-level, aser ADC, Agartala Municipal Corporation (AMC), Urban local body, Panchayat level o village level nung luden balala tentettsü atema tetuyuba agütsü.

"Tongtipang alizüngji wara menatepa aoba aziüktsü atema

lir. Ludentemi anogoshia tensa asadangtsü, mapa inyaktsü aser nübortem dang osang metetdaksütsü" sorkar otongdar aser Law minister Ratan Lal Nath-i ashi.

State-level committee nung chief minister, deputy chief minister, revenue minister, education minister, East and West Tripura MPs, Rajya Sabha MP, chief secretary, secretary of health & family welfare department, Tripura police chief, director, aser secretary of revenue nunger dena lir.

District committee nung

MLA tem den district magistrate, district superintendent of police, district chief health officer aser district education officer nunger adentsü.

Ano, blocks, municipal councils, AMC, panchayats aser village-level committee nung MLAs, village heads, village secretaries, municipal commissioners aser administrative officers adentsü.

"Tripura sorkari iba wara anema longjemer raratsü lemtetogo. Ludentem amalitepa inyaktsü onoki imlar" ta Nath-isa ashi.



Lafarge Umiyam Mining Private Limited (LUMPL) Operations Director Narayan Sharma-i Meghalaya Chief Secretary nem High-Flow Oxygen Equipment agütsüdang agiba noksa angur. Meghalaya sorkari COVID-19 wara anema inyakra nung amshitsü atema LUMPL-i Corporate Social Responsibility (CSR) kübok High-Flow Oxygen Equipment agütsü. (Shillong, May 21)

Manipur sorkari COVID ajanga takoksa ajuruba tanurtem anepalutsü

Imphal, May 21, 2021

(Agencies): Tawa tu Manipur Chief Minister N Biren Singh-i COVID-19 ajanga tsürabur kongshiba tanurtem anepalutsü indang scheme ka tenzükba metetdaksüogo.

Iba scheme kübok sorkari healthcare facilities nung Covid agi shiranger mesüra Covid agi shiranga asüba tanurtem yaritsü. Iba scheme kübok tanurtem arishi küm 18 matong

tashi yaritsü.

Iba scheme kübok tanur nem education, food, accommodation aser basic necessities agütsütsü.

Manipur sorkari state nung Child Care Institutions 30 lemezüktsüogo. Itemji district 15 shia nung tebur aser tetsür atema anana lir.

State sorkarisa COVID agi shirangertemi timtem ajuruba atema CM's COVID-19 Grievance Cell lapokogo.

Assam CM indang principal press secretary asütsü atema Dhruba Mahanta shim

Guwahati, May 21, 2021

(Agencies): Assam chief minister Himanta Biswa Sarma indang principal press secretary inyaktsü atema journalist tejen Dhruba Mahanta shimogo.

Mahanta ya Assamese news channel News Live nung consulting editor lir.

Mahanta-i principal press

secretary inyaktsü, ta Hokolbarnü CMO sangdong ka nung metetdaksü.

Maneni, officer on special duty (communication, public relations and protocol) inyaktsü atema journalist Naba Patgiri shimogo aser chief minister indang personal secretary atema Gautam Prasad shim.



Hokolbarnü Guwahati nung Assam Chief Minister Dr. Himanta Biswa Sarma aser taoba Chief Minister Sarbananda Sonowal na 15 buba Assam Legislative Assembly (ALA) nung adentsü atema arundang agiba noksa angur. (Guwahati, May 21)

POCSO kübok tai tonglokja alir ka SP inyaktsü shimba ashishir

Guwahati, May 21, 2021

(Agencies): Assam sorkari tawa Assam Police nung mapa belenshiba nung tanur dak tashiyim mapa inyakra atema tai tonglokja alir IPS ketdangsur ka district ka nung Superintendent of Police inyaktsü lemezüktsüogo.

Iba ketdangsur ya Guwahati nung mapa lemezüka liasü aser idangji Indian Penal Code nung arla 354, 354A aser Protection of Children from Sexual Offences (POCSO) Act kübok tai tonglokja liasü.

Taküm March 31 nü Assam Police-i pa anema charge sheet ka benok aser ibaji Special Judge, POCSO Act, Assam, Kamrup Metropolitan district tsüngdang agütsüogo.

Ajisüaka, tang iba kasa ketdangsur nem mapa tasen lemezüktsüba ajanga nisungtemi state Home Department den ashishiteper.

Iba dak sendakba nung All India Mahila Congress president Sushmita Dev-ia Assam chief minister Himanta Biswa Sarma dangi shidi ka zülüogo. Himanta-i home department bena lir.

"Tesüiba küm ishika Assam nung tetsürtemi lendong kanga ajurua arur aser India nung tetsürtem dak tim masüba maparen inyakra state tem rongnung densema lir. Tanur ka dak tashiyim mapa inyakra atema tai tonglokja alir ka nem district ka nung law & order ketdangsur lemezüktsüba atema süiki ia bilemer. Tarak aketba ketdangsur ka dak nübortemi kodaser tamang akatsü?" ta Sushmita Dev-i shidi nung shia lir.

Assam sorkari iba atema telangzüba kecha magütsü saka Assam Director General of Police Bhaskar Jyoti Mahanta-ibo iba ken o ya "Sub judge" süogo ta ashi.

Okadaki tanga obendang ka magütsü tashi tai tonglokja alisangi mapa inyaktsü akok. Okadaki telemetba agira tai tonglokja alir aputsü, ta paisa ashi.

"Tanur dak tim masüba mapa inyaker ka SP? Iba ya Assam nung mesüra India nung dang ataloktsü" ta Assam Congress General secretary aser media chairperson Bobbeeta Sharma-ia metetdaksüogo.



TIR YIMYIM

YIMOBILEM (EDITORIAL)

DIMAPUR KÜPTOKNÜ, MONUPII (MAY) 22, 2021

Talibo metsübuoktsüla

Kodang nisung ka tsübuokdir mesüra tasü beletdir, pei aküm anüla angu nunga aser süngo tu tsükba angashi nunga aoksatsü. Ibaji mesüka tanü asenoki Covid-19 tashidak ya talilaka tsübur amai bilemer. Atangji, tsübutsubaji nisunger shisatsü nung enokja lir, saka kodang talila ka tsübuokdir, iba jagi asenok tajung mapa dena meinyaktetsüsa tasümaim akümer. Shitakba nung Coronavirus wara ya yimrayimshi ka dang lir, anungji mapang shitak nung akhidang yimra agi atongdang anepaluba ama temulung agüja anepalura melamelaa jungadoktsü. Akhidanga, yimra agi atongdang aser aket dangbo government-i ozüng magütsüyonga, tangar dak menaloktsüalir ta bilema, peisasa angateta, lokti senen aser senteptsütepi aser kisemtsüsemi mao. Pei kidanga sü agi tejak tebang nembanger dang kazü, tzümülu talem dang ajem, temang lemdakja teku aser temang nung totzü mezüa nemshi, kinungertem den auso marok kasasa melentepa mamshi, külemi memejang aser chiyongtsü tatsük talem dang achi. Ajisüaka, kinungertemi mashibang aser ki balaka nunga melidoktsü. Aji oda, yimra agi sashia tonger aketer, temang metar ta shirangaka kidang külemi lia auso marok dang balaka amshidakja yaritep. Tanüa kasa tangatetba aser inyakyim nung Covid-19 tashidak putettertem aser shirangertem ya kangabo azüngapong mesüdaoktsü kidang asüyonga, mozü kidang asüyonga anepalu nung jungla ta bilemer. Atangji, tenük agi angutsü makokba yimra tesashi senzür asünungji, asenok ajak kanga kümdangtsüla. Kecha metsübu aser mekümdangi senzüba o kecha metsübu kanga kümdanga senzüba na kenyongi balala lir. Alima ajunga nung Corona virus agi nisung remer merema asür saka asenokbo kecha metsübu temang merükmejua masü, teni tebang menembang ser chiyongtsü tajung chia temang tashi itta alitsü melena sali moko chia, yi jema mashimashi lira, ajibo kanga tamashi asütsü. Aji oda, tashidak wara ya kangabo metsübutsubüla ta asüba tetezü metsübu tashidak menatsüsa mashimashi alitsüba indang jembir masü saka shiranger tonga oagi yari nunga tashidak memenatsüsa kümdanga renemer anepalutsü indang jembir. Temeim o tetsübu na ya tzü o mi na amato lir, anungji temeim agi kokra kecha metsübu aotsü aser yariteptsü saka tetsübu nem kokdaksüra pei taküm kümzüksü bilemstüba dak alaka tetsübu agi shinga tonga moutettsü. Tang yabo asenok kanga tsübuokadokba agi, shirangertembo yutsür meshirangertema tsübur aser temeimtsüka tasümanga dena tesem aika nung pei kidangi bener arutsü memelar. Tasümangji mashih tashibo kecha mali, tasüji tasü ser nung asenoki iba nung jagia tashidak menatsü amai bilemer. Ajisüaka tashidak menatsübaji tasümang dak nung jagi masü saka taküm alir mangmongdak amongertem nungi menateptsü, anungji mangmong dak amongertemji mask agi teni tebang nembanger tepila lia menra, iba jagi kümzüksü. Asenoki aiben tasümang meyutsüba kin ta jembir, saka tang tashidak mesen tsübuaba agi asen kinunger adianu mang dena kidangi bener marutet, marudaktsü aser leperi dena bener moutet tsübuaba ya koda? Asenoki leprosy (chitemra) tashidak indang meteta lir, atangji iba tashidak yaa neptsü bangtsü nungi menateper saka kongshiba agibo memenateper, ajisüaka asenokibo tonga aotsüa tsübur. Item nisungtemji Mother Terasa-ibo bushia oagi anidena kiyong ka Calcutta nung mesemtet aser iba tesem dangji Shanti Nagar ta aja aser yangji leprosy aketerem komoji shidoka anepalu. Iba indangji lai kenü osangbener ka den jembidang, "leprosy dang nungibo nisungtemi leprosy tsübuaba aser sempaba jakla aser temulungsentsüsa tamajungba," ta lai ashiba otsü lir. Iba kasaji, tanü Covid-19 tashidak wara ya masü saka asenoki Covid tashidak tsübuaba tetsübu aser Covid agi shirangertem sempaba jakla aser temulungsentsü yasa tetsübutsubü aser tesempatsü taketba kümogo. Iba amaisa tsübutsubü nungbo kidang sorochioka agütsüra mali, ambulance gari anirtema mali aser mang remtsürtema mali kümadoktsü. Ibaji dang masü saka oda odabo mozü kidang inyaker ajak anenadoktsü. Idangji asenok Corona mesen dang nungi jena oagi arem nung jenoktsü asü mesüra ki shibanger lumia amongtsü? Tashidak tsübutsubaji tim dang saka tashidakji asenoki mozü agidang masü saka temang anepalutsü metetba wainshin aser temeim agi akoktsü merangdi. Asenokia tangar meyaritsü aser tangar manga meremtsütsü ta tsübuseta dang lira, asüng asen manga teremtsür malitsü. Loktisa mesentepaka tenla ki ajak kijiba (window) dena lapoka yuang aser yimdong nung mashimashi mesenzüyonga asen sobaliba awashi tajung to meindoki timi yaritepang. Mozü kisüngi masü item jagi Covid tongpang ya akoktsü.

OLEMSABANG

COVID WARA MAPANG ASER WARA SÜLEN AROGO TEINYAKTSÜ KAR

~ Wati Longchar (Serampore)

(Yashi adok nungi...)

Govt.i, administrationi, policei mesüra yimtsüng yimsüsüri inyakba amaji arogoi meinyaktet aser inyaktsü memerangtsüla, süra arogo teinyaktsüji kechi? Iba ama wara mapang nung arogoi kechi mapa nung temulung tali agütsütsü nungdak? Arogo mapaji kechi?

Tanü asüng Artificial Intelligence ajanga mapa kanga dang efficient süa inyaktsür, tat. agi., nai mobile phone nung timing set süa ayu nung mapang shitak nung ola adoktsü. Kishi lapoktsü aser shipangtsü finger print set süa ayu nung, ne tekabu dang sayu nung kishiji lapoktsütsü. Tanü machine-i meimchir dang nungi efficient tasüba inyaktetba putu ka nung lir, saka machine jagi temeim kodanga sayutsü makok, machine jagi nüksü yima tsüah ta aria bilemstütsü makok, meimchir timtem, touchi angateta ni tanübo yamai sütsüdi ta ashitsü makok. Government-i lokti ajungtsü atema asa-lendong balala yanglur, nisung ka, kibong katoushia aliba mapangteyari kar khen agütsütsü akok, saka temeim, temulung anizüngzük o, temulungdangtsü o, mapang shiaarua sarasademja timtem khuret lemsateptsü makok. Kasaji administration, aser policeaser yimtsüng nung yimsüsürtemiozüng balala ajanga nüburtem azüoktsü akok, merenshitsü, senchi achitsü, aser hospital nung alidang, Doctor aser Nurse-i temang anebalutsü aser mozü mapang shitak nung agütsüba dak alaka, nisung ka temulung zürepa, azüngmeyaka, shisabulua, alima nung nia iba timtem ya ajurutsü liasü no ta, ozü kibong dakbo yamai kechiba ataloker ta Tsüngremi sendokadok ama shisabulua alidang, telokkechaia meyaritetsü. Temeim mapa, temulung anisüngzük o, teyari mapa, temulung ulutsü o, sarasadem, tanela chiyungtsü arogoi tabensaba inyaktetsü. Iba asoshijiarogo ajatet. Asenoki amangba Yisu Khristaia iba tenyaba mapa ataloktsütsü ni aru ta kuli asü aser yamaji inyak.

Arogo teinyaktsü aika dang lir, saka yangi Covid mapang aser Covid wara sülen arogo teinyaktsü tongtibang ana dang lemsatepner.

A) Short-term teinyaktsü mapa: Mapang shiameimchir kija aser teloki ajungben lendong aika ajurur, tat. agi. kitsük-kirung, menoknok, tzümeitsünyamala ajanga teraksa tulu bener arutsür. Kitsük-kirong mapang, shingaia shinga matar, mesürashinga ken tena, tsüngsanga, noksa agia, chia-jemapelatepa kazüa matar. Shinga danga masüngdangi pei ket nung kechi aka aji ameremiji remsepdaktsütsü meranger. Kari tzü shiloktsür, kari süngo tu agizükamiji tepniker, kari oset-set agizüksürtta pettepa inyaker. Iba dangji emergency, short term, jongdak nung taküm kümzüksü merangba mapatem lir. Covid wara yaa emergency mapang ka lir. Iba mapang ya shitak-meshitak, mesüra tangar kar aijaya arogo aser Govt.mapa, parnok kechi repringakazür tajembia ajemajema alitsüba mapang ka masü. Aseni akokba tashi, asen ket nung kechi aka aji amshia iba wara koktetsüba jongdak mapang ka lir. Nungdakra taküm kümzüksü asoshi tenla ki, guest house, school ki shipanga yutsür hospital kümdaktsütsüba mapang, sen sarua agütsütsüba mapang; community kitchen lapoka sorochioka agütsütsü mapang, arogo care ambulance kümdaktsütsüba mapang, telephone ajanga dang süaka counseling, sarasadem aser Lai oagi tajungshi agütsüteptsüba mapang. Hau, arogoi rongsen, mapang jenti lalua India lima nungi asen nübur meyipa arurtem, timtemertem, tasü lendang ajururtem, sensaker aika anebalua arudagi. Itemji kanga tongtibang aser maneni inyaktsüla. Ano asenoki metetsüba kaji ibala emergency mapang Governmenti kechi ozüng agütsür aji angatsüla. Tashitak koktetsü aritepa inyakba mapang nung, ibai Tsüngremi temerenshi ta amok memerentsüla, alima tatebangi arur tamejembitsüla, vaccine magitsüla ta mashikoshi o mejembitsüla. Nüburtem temulung ratadaktsütsüba fake newsforward mesüteptsüla. Koda süra nübur songjen lungjemer iba tashitak wara koktetsü ta asüba nükjidongji dang yur maparen ajak inyaktsüla.

(Maneni asüng adok nung...)

- Yimozülur dangi -

Otsü 100 Bongdang, kaket koba R. Imti Imsongi züluogo, Iba kaket ya kanga dang tajangzük aketba kaket ka lir. Ni iba kaket tetenzük nungi tatem tashi leplalephsia züngogo, tatishitsü tajung, tetezü aketba otzü tatsü aser Tangazüksü aketba kaket tajungah. Nibo kanga temoatsü nguogo, kaket azüngtsü janrar temibo ajaki alia azüngtsü ajungshir.

Tsüngremi kaket zülur taküm aser kibong moajangma. Amen.

- Aienla Ao

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Covid tetuyuba anema inyakba atema Canada nung pastor ka apu



May 16 nü Southeast Calgary, Canada nung police-i Fairwat Baptist Arogo nung pastor, Tim Stephens apudang tangokba noksa nung angur.

May 21, 2021: Southeast Calgary, Canada nung aliba Fairwat Baptist Arogo nung pastor, Tim Stephens-i tesüiba ita aika par Arogo züngsemtem dang ketdangsertemi coronavirus anema tuyuba telatetbatem anema asenoki inyaktsüla, ta ajungshia aruba sülen May 16 nü police-i pastor puogo.

Canada police-i ashiba agi, pastor Tim Stephens-i Amongnü tekülem sentong ayongzüka agiba atema pa apu.

Calgary Police Service & Alberta Health Services-i sangdong ka ajanga, "Pastor-i tetuyubatemi meteta lir, ajisüaka pai tanü tekülem sentong ayongzüka agi," ta metetdaksü.

Tang Canada nung kilung

nung nisung 15 dak tema adenshitsu memelar.

Tan ita tetenzüklen ketdangsertemi nisung 15 dak tali madenshitsu tuyuba sülen pastor Stephens-i blog post ka ajanga, "Tenla kidang nisung 15 tashi dang adenshitsu melaba tetezü Arogo adenshiba nokdangba lir, aser ibaji Khristai melungba anema dang masü saka Tsüngrem O nung shia aliba ama sentsüwangshi Kibuba külemtsü jangjartem tangatetba anema lir," ta lemsatepa liasü.

May 9, 2021 nü (Amongnü) sayutsüngiba mapang nung pastor Stephens-i, Arogo maneni longjema külemba tetezü, Khrista tashi angaba ajanga alima nung tashi ajak madak takok anguba lir, ta

jembia liasü.

"Civil sorkarji Arogo madak yimsüsürtem masü. Laishiba nung Rome 13 mesüra 1 Peter 2 nung civil magistrate nem Arogo madak tashi magütsür. Arogoji Khrista temang aser Khrista kiyimla lir. Parnoki ochi obendang atema tashi amshitsüla saka tekülem agiba mesüra Khrista külemtsü atema asenok adenshiba nung tebang maittsüla," ta pai ashi.

"Tsüngremi melungma ama inyaktsü atema sorkari asenok nokdang. Anungji asenoki nisung dang nungibo Tsüngrem tashi ang angatsüla," ta pai ashi.

Tan ita tetenzüklena ketdangsertem tetuyuba anema lokti adenshiba atema pastor Artur Pawlowski aser Dawid Pawlowski na pua liasü.

Rajasthan nung Hindu nungeri pastor ka tebu khaset aser 3 yirutsü

Washington D.C., May 21 (Agencies): India kübok Rajasthan state nung Hindu yimsü alia amangertemi Khristan kibong ka amakba mapang nung arrshi küm 52, Khristan ka khaset aser asem mejungi yirutsü, ta International Christian Concern (ICC) osang ajanga metetdaksü.

May 18, 2021 nü Bansawra district nung Hindu yimsü alia amanger nisung 15-i noklangnok, ninok aser prangpong amer arua Pastor Ramesh Bumbariya'er kibong amak. Pastor kibongi Khristan yimsü toktsütsü memelungba agi Hindu nungeri parnok anema inyak.

Parnoki Pastor Bumbariya dak injang khaloktsütsü merang saka prangpong nungi injang madok. Iba sülen parnokisa Pastor Bumbariya tebu, Bhima Bumbariya dak injang khalokja khaset aser pastor densema kibong züngsem ana dak mejungi azük.

Pastor Bumbariya den par kibong züngsem ana Udaipur nung aliba hospital kati anir ao,

ajisüaka tang coronavirus agi shirangertem anepaluba agi hospital nung parnok magizük. Iba sülen parnok anasa aliba nija hospital kati anir ao.

ICC den jembidang pastor-i, "Ni kümzükbaji Tsüngrem sentong balaka aliba agi asütsüa akok ta ni bilemer. Tsüngremi kü nem lemzüksüba wadang ni maneni inyaktsü," ta ashi.

Pastor Bumbariya-isa, "Tamangba yimsü atema onoki tenla jenti agütsüogo. Parnoki onok lu agiadok, ki raksatsü aser tang onok taküm-a aginer. Ni ozü kibong aser chirnurtem atema shisabulur," ta metetdaksü.

Pastor Bumbariya ya Bansawra District nung Arogo tasen tenzüksür ka aser pai yimtsüng aika nung house churches-a tenzüksüogo.

Arogo lenirtemi ashiba agi, taoba mapangtem nunga Hindu yimsü alia amangertemi Pastor Bumbariya anema aiben inyakogo aser pai kangshia tangar aika Khristan yimsü dangi meyipdaksür, ta pa nem

tai tonglokja aruogo.

"Ni kübu asüpila sentong nunga medentetsü, kechiyong ni tasü yipten nung lir. Tang ama tensa ka nung Tsüngremi taochi sayuba atema ni Tsüngrem dang pelar," ta pai ashi.

ICC Regional Manager William Stark-i, "Pastor Ramesh aser par kibong amakba atema onok International Christian Concern purtemi tebilemtsü kanga katsür. Onoki parnok taneptsü angutsü atema sarasademtsür aser Bhima asüba atema parnok den külemi mangyimer. Yisu Khrista sülen anidakba atema shinga metepsettsüla. Ajisüaka tesüiba küm ishika India nung Hindu nationalist tem tasü itshir Khristantem anema inyakba kanga bulua kümogo. Yimsü alia amangertem nem temerenshi agütsütsü atema ketdangsertemi inyaktsüla aser India linük temzüng nung shia aliba ama India nung Khristantem nem tamangba yimsü temeden balala agütsütsüla," ta metetdaksü.

ANOGO ABEN TSÜNGREM DEN

Kibubai pei pur meteter

"Kibubai pei pur meteter aser shibai Kibuba tenüng tushidir pa memeshiba nungi piladakjang".

2 Timoti 2:19

Yisu Khristai bener aruba osangtajung ajanga menenpur ka Tsüngrem tsüngdang temeden angur, temeshi nisung kümdaktsür aser Tsüngremi mulungba lenmang nung jajar. Peter-i tenemnü benjung nung sayutsüngir, temulung meyiper dang memeshiba yimya nungi pila alitsü ajungshi. T.Mapa 2:40. Yisu dak amangba ajanga taküm tasen pokteter. Taküm tasen nung yimya, jakla-libaliro tasen akümer kechiyong taküm tasen akümertem Tsüngrem Tanelai azüoker aser memeshiba nungi pila alir. Saul temulung memeyipdang Arogo anemer nisung ka liasü, saka Damaska among nung Khrista ajurur külen, pa Arogo yanglur tongti ka aküm.

Yihuda Iskariot Yisu nütsüng ka liasü, Yisui tesüngmangtsü mapa inyakba angu saka pa taküm tasen maküm nungji pa dak aliba ashikülak mulungsentsü agi tatem nung Yisu ashiochtsü. Yisui bener arutsüba tekümtet ya temenen nungi alangzüktsü aser teti asoshi Kotaki aotsü renemtsüba dang masü saka alima nung alidang memeshiba lenmang nungi piladaktsütsü tashi agütsür. Memeshiba lenmang nungi pila litetba takümji Kibuba meyong temaitsü lir.

Sarasadem

Temei Tsüngrem, memeshiba nungi pila alitsü Ne tashi meshir. Amen

Algeria nung sorkari Tenla ki ajak shibangtsüogo

May 21, 2021: 2018 küm Algeria sorkari Tenla ki 13 shibangtsüba mapang nung tenzüka linük nung sorkari Protestant Arogotem Tenla ki ajak shibangtsüba sülen tang ketdangsertemi Khristantem anema apusor.

Algeria nung coronavirus wara prokba mapang nungi tenzüka wara nokdangtsü atema Tenla kitem shibangdaksüba sülen tang tashi tanaben lapoktsü memelar, ajisüaka Muslim nunger tekülem kitembo tanaben lapoktsü melaogo. Ministry of Religious Affairs-i Protestant Church of Algeria (EPA) dang, Tenla kitem tanaben lapokdaksütsüji onok mapa masü, ta ashi saka Ministry-i iba atemaji shinga nema mapa melemzüksü.

Protestant Church of Algeria (EPA) Tir aser Tizi-Ouzou nung Full Gosepl Arogo nung pastor, Salah Chalah-i, Algeria Tir, Bouteflika anenba sülen 2019 küm October ita nungi sorkar ketdangsertemi Arogo anema inyaker, ta metetdaksü.

Tamalen ICC den jembidang Pastor Chalah-i Algeria nung Arogo atema

sarasademjang ta mepishiba den külemi 2019 küm October ita nung par Arogo Tenla ki kangshia shibangdaksüba video ka lemsatepa liasü.

Tang tashi Algerian Protestant Church-i hopta shia online ajangadang tekülem sentong ana agiba den social media ajangadang sarasadem sentong aser training balala agir.

Joko Algeria nung Tenla ki ajak shibangtsüogo, saka maneni sorkari Khristantem anema inyak tenzüko.

Osangbener den jembidang Pastor Chalah-i, tang linük nung Khristantem anema inyakba inyakyim tasen ka tenzüko, ta metetdakja liasü.

Algeria nunger Khristan, Hamid Soudad-i Tsüngrem mezüngmeshiogo ta aitsüba sülen pa küm 5 tepuokdak ayutsü obendang agütsü.

Pastor Rachid Sieghir aser pa indang bookshop assistant, Nouh Hamami natia Tsüngrem mezüngmeshiogo, ta aitsüba sülen küm 2 tepuokdak ayutsü obendang agütsü; iba obendang anema May 16, 2021 nü tenati temepishiba ken o ka agüja lir aser iba ken oji May 30 nü ajangangtsü.


OLONG PAITEP # 5819

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										
							25			

- | | | | |
|-------------------------------|-------|--|-------|
| TIPIEN | | LANGTSÜNGLEN | |
| 1. Saku | - (4) | 1. Taksep | - (3) |
| 6. Songjen | - (7) | 2. Langtem | - (5) |
| 7. Mali/Tazung | - (4) | 3. O tamendaktak | - (4) |
| 9. Tasen apok | - (6) | 4. Nütsü tebuba | - (3) |
| 11. Songtem | - (3) | 5. Anüngdang tesangwa | - (3) |
| 13. Ata liasü | - (5) | 6. Apitet | - (5) |
| 16. Tzünglu den külemi tsüker | - (3) | 7. Yagi jungdaksür | - (4) |
| 17. Aso tila | - (6) | 8. Anogo semer ka | - (3) |
| 20. Tashi maküm | - (4) | 10. _ _ _ tatsü | - (3) |
| 24. Tenüng kasa jatepba | - (7) | 12. Tebur kidong aser zünga kasa tsüngda jatepba | - (4) |
| 25. Ki yangluba oset | - (4) | 14. Pela agizükba tapu ka | - (5) |
| | | 15. Tenüng atet | - (3) |
| | | 18. Mejanga onü | - (5) |
| | | 19. Talak techira | - (4) |
| | | 21. Maneni | - (3) |
| | | 22. Nübo teyi | - (3) |
| | | 23. Meshi | - (3) |

OLONG PAITEP # 5818 TELANGZÜBA

- | | |
|----------------------------------|--|
| TIPIEN : | LANGTSÜNGLEN : |
| 2. Anükalem, 4. Mesak, 5. Apet, | 1. Kündang, 2. Ayak, 3. Leptep, |
| 9. Meimtep, 11. Posü, 12. Patak, | 6. Sati, 7. Yiar, 8. Sangküm, 9. Metsük, |
| 13. Tekettsü. | 10. Mazü. |



TANÜBO NAI LANGZÜANG

Q. IAX system yagi Mumbai aser Chennai nungi _____ tashi India den sendaktepsü.
 A. Thailand and Malaysia
 B. Thailand and Singapore
 C. Malaysia and Singapore
 D. None
 _____ (Taruba adok nung onoki langzütü)

YASHI ADOK TELANGZÜBA : Bangalore

AO OSHI ANGAZÜKDAK:

TANÜ ANGAZÜKTSÜBA OJANG

Jakshi

- (v) Prokshia ao (spread out)
- * Aortem ya Jungliyimti nungi jakshi

Jepdak

- (adj) Idangjisa (immediate)
- * Onoki parnok dak jepdak mang ayang.



Tir Yimyim

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA?

Brazil anüolen tip tsütsü Encantado tesem nung teyangludak aliba 'Christ the Protector' ya metong nung metre 43 (süklep 140) talang asütsü, koba alima nung Yisu kürakyanglu talangtiba rongnung tasembuba akümtsü. Iba maparen ya 2019 küm tenzüka liasü. Christ the Protector kürakyanglu yanglutsü atema politician Adroaldo Conzatti-i tasa agütsü, shiba March ita Covid-19 agi asü. Dollar 350,000 (pound 255,000) project ya taküm küm tatemlen renemtsü imlar, ta Friends of Christ telok den külemi inyaker tentet kati ashi. Iba Project atema nija aser company balala ajanga tenla agütsü, ta iba tenteti shisem.



SUDOKU # 5862

1								3						
			7					1						
			7	8						2				
					6	3	4	5						
	4		5				6	3	1					
5		3		7	4				9					
		6					7	8	5					
		5	6	8			2							
4				5	9				6					

TELANGZÜBA # 5861

6	7	9	3	1	4	8	2	5
4	8	5	7	9	2	1	3	6
3	1	2	5	8	6	7	4	9
1	9	8	2	7	3	6	5	4
5	4	3	1	6	8	2	9	7
2	6	7	4	5	9	3	1	8
7	2	4	8	3	5	9	6	1
8	5	6	9	2	1	4	7	3
9	3	1	6	4	7	5	8	2

OJANG LUTEP # 5405

AMKTÜ	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
UNNG	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
ATKKO	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
LLBAAA	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
RAUUDAJNG	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
AASÜÜKM	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
BIRLEAM	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
NGOKDAA	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
ETTAM	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
MSAGTTONÜ	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>

OJANG LUTEP TELANGZÜBA # 5404

**MEINYAKTSÜ MESÜRA MELITETTSÜ SERNUNG INYAKTSÜ
 AMA JEMBIA LITETTSÜ AMA SAYU**

TAN HOPTA ATEMA - KOMA SÜLA ?

Q. Covid mozü kidang inyaker doctor, nurse aser staff-tem asoshi anogo shia chiyongtsü mozü ki anasa aliba arogotemi longjemer agütsü nunga koma süla ?

Statepezü aser UT kanung 'Black fungus' ya epidemic tasangdongogo



May 21, 2021 nü Ahmedabad nung aliba SVP Hospital kima Black Fungus agi shiranger kinüngertermi Amphotericin B injection alitsü atatepba noksa nung angur.

New Delhi, May 21

(Agencies): India nung coronavirus tashidak tanaben prok tenzüker iba wara menokdangtetba tensa ka nung ano linük nung 'mucormycosis' ta ajaba Black Fungus tashidak ajanga tebilemtüsü khuret tasen ka bendenlokogo.

Iba tashidak ya mezüing Maharashtra kübok district ishika nung Coronavirus tashidak agi shirangerterm dak puteta liasü, saka tangbo Karnataka, Uttarakhand, Telangana, Madhya Pradesh, Andhra Pradesh, Haryana aser Bihar state tem nunga putetogo.

Maharashtra nungbo iba tashidak ya nisung 1,500 tema dak putet aser nisung 90 dak tema süogo. Brihostibar tashi nung Haryana nunga nisung 226 aser Telangana nunga nisung 80 dak iba tashidak putetogo.

Brihostibarnü Centre sorkari state tem dang 'Black Fugus' ya Epidemic Diseases Act 1897

kübok kanga bulua menatepba wara ka ta sangdongang, ta mepishia liasü.

Centre-isa states aser UTs dang sorkar aser nija hospital ajak dang pei hospital nung black fungus putetba osang metetdakjang, ta mepishi.

Centre sorkari mepishiba nung ajemdaker Tamil Nadu, Odisha, Gujarat aser UT-Chandigarh temi kasa anogo nungjisa iba ya bulua menatepba wara ka, ta sangdong.

Taoba hopta health ministry-i, iba tashidak ya coronavirus tashidak nungi taneptsü tengudakpurtem mesüra aneper alirtem dak puteter, ta metetdakja liasü.

Coronavirus agi shirangerterm ICU nung oxygen therapy agiba mapang 'humidifier' amshir, aser ibaji ajanga black fungus melaa menar.

Iba tashidak ya mucormycetes, ta ajaba micro-organisms ajanga adokdaksür,

aser iba ya talisa ali, süngo tou tai aser jana nung alir. Iba tashidak ya mezüing tenütsü, teni, tenipong aser tenük o tepo na tsüingda nung skin infection ama tenzüker, iba sülen tenük, tepokpok aser tekolok tashia prokshia aoer.

Iba sülen teni sentsü nakrema melener, tenüki junga mangur, teku ashir, tangu junga mesashiteter aser aketdang azü adoker.

Iba tashidak atema tenük doctor, ENT specialists, general surgeons, neurosurgeons aser dental maxillofacial surgeons ajurua treatment agitsüla aser shiranger nem antifungal mozü-Amphotericin-B injection agütsür.

Iba dak sendakba nung Indian Medical Association (IMA)-i Ato kilonser, Narendra Modi dang Amphotericin-B mozü yanglutsü atema temsüa aliba pharmaceutical company tem nem temelaba agüjang, ta mepishio.

India nung Covid case million 26 jungogo; ano nisung 4,209 asü

New Delhi, Monupii/May 21

(Agencies): India nung ano nisung lakh 2.59 dak coronavirus putetba sülen linük nung coronavirus case ajak agi million 26 (2,60,31,991) jungogo, ta Hokolbarnü Union Health Ministry-i metetdaksü.

Tesüiba ghonda 24 nungsa linük nung coronavirus agi

shiranger 4,209 asü, aser tang tashi nung iba tashidak agi asür ajak agi 2,91,331 jungogo.

Tang linük nung coronavirus agi teshirangdakpur 30,27,925 dang kümogo, aser ibaji coronavirus caseload nungi shilem 11.63 lir, ta Health Ministry-i metetdaksü.

Linük nung iba tashidak agi

shiranger ajak agi 2,27,12,735 anepogo aser iba tashidak agi shiranger asüba shilem 1.12 kümogo.

Hokolbarnü ICMR-i, May 20 tashi nung linük nung samples ajak agi 32,44,17,870 tendangogo, aser iba nungji Brihostibarnü samples 20,61,683 tendangba densema lir, ta metetdaksü.



May 21, 2021 nü Prayagraj (Uttar Pradesh) nung aliba Moti Lal Nehru Medical College kima coronavirus vaccine agitsü atema nisungtem atatepba noksa nung angur.

Covid virus abenba Aerosol mopung nung meter 10 tashi senzür: Centre

New Delhi, May 21

(Agencies): Coronavirus prokba tongtiji aerosols aser droplets ajanga lir, aser aerosols ya mopung nung metre 10 tashi senzür, ta metetdakja principal scientific adviser -i nüburtem dang coronavirus memenatsü atema nisung tsüingda pilaa alitsü metetdaksü.

Mopung peria maitba kitem aser offices nung mopung peria aitba ajanga nisung kati ka dak tashidak menaloktsüba ajemtsü, ta kasa osang ajanga metetdaksü.

"Kichiba aser kishitem lapokba aser exhaust systems amshiba ajanga ki telung nung temenemtsü mopung nung mopung peria aitba ajanga mopung nung virus ajema küm daksür, koba ajanga tashidak menatepba ajema akümer," ta principal scientific adviser office ajanga

metetdaksü. Iba dak sendakba nung Principal Scientific Advisor office sangdong ka ajanga offices, ki aser pulic buildings nung mopung peria aita daksütsüla aser kilung nung mopung peria aita daksütsü atema inyaksüla, ta metetdaksü.

"Azü kitem densema ki balala, offices aser building nung pangka ayutsüla, kichiba aser kishitem lapoktsüla, kichiba tera lapokba agia kimalen nungi mopung aitba ajanga kilung nung mopung quality tajungba akümtsü. Iba wara prokba ajemtsü atema ventilation aser exhaust fans inoktsüla," ta kasa sangdong nung shia lir.

"Tashidak temaitsü keta malirtemia wara proktsü. Nüburtemi maneni mask agitsüla, mask ana agitsüla mesüra N95 mask agitsüla," ta sangdong nung shia lir.



New Delhi, May 21, 2021: Taoba mapang Ato kilonser, Rajiv Gandhi sür küm 30 ajungba anogomong nung Hokolbarnü New Delhi nung Congress lenir, Rahul Gandhi-i tebu memorial semdanga akhüm agütsüba noksa nung angur.

Foreign Minister, S Jaishankar-i taruba hopta US semdangtsü

New Delhi, May 21

(Agencies): Taruba hopta External Affairs Minister, S Jaishankar-i United States semdangtsü, ajisüaka tang tashi nungbo official sangdong memetetdaksü.

Coronavirus vaccine production atema tang India-i US nung company balala den jembidar, aser

Jaishankar-i US nung lenirtem den senden amenba mapang nunga coronavirus vaccine atema jembitsü, ta osang angazüker.

Tan ita tetenzüklen-a London nung G7 Foreign Ministers senden nung EAM Jaishankar-i US Foreign Minister, Antony Blinken ajurua liasü.

US-i nungdakba linüktem nem parnoki rizünga aliba coronavirus vaccine million 80

lema agütsütsü ta sangdongogo.

Tang India nung coronavirus tanaben prokba mapang India-i US dang nungi vaccine aika angutsü imlar, iba denji külemi India nung vaccine aika yanglutsü atema vaccine yanglurtem den tezüngzüktep yanglutsü.

Tang US ket nung Astra Zeneca vaccine million 60 den Pfizer, Moderna aser Johnson & Johnson indang COVID-19 vaccine aika lir.

India-i coronavirus anema raraba tongbang nung US-i tongti shilem agia India yaridar. US-isa India nem oxygen plants, concentrators, Remdesivir agütsüba den külemi India nung Covishield vaccine yanglutsü atema Serum Institute of India (SII) nem 'raw materials' aika agütsüogo.

Suu Kyi'er telok shibangtsütsü election commission shimtet

Naypyitaw, Monupii/May 21 (Agencies): Myanmar nung mitkartemi shimba election commission ajanga Aung San Suu Kyi'er National League for Democracy Party (NLD) shibangtsütsü, kechiaser November election nung parnoki ashikulak mapa inyak ta parnoki ashir, ta Myanmar Now osang ajanga Hokulbarnü ashi.

NLD densema party aikati magizükba political party tem den senden amenba mapang iba telemtetba ya agi, ta Myanmar Now ajanga ashi.

NLD ajanga election nung ashikulak mapa inyakba ya ozüing alema lir, anungji onoki party ya shibangtsütsüsa akumtsü, ta mitkar nungitba Union Election Commission (UEC), mendenpuba Thein Soe-i ashi.

"Shirnoki aji inyak, parnokji ashikulaker ama züingshitsu aser onoki merenshitsu," ta Thein Soe-i ashi.

Mitkartemi busemba Union Solidarity and Development Party indang odongtar kati, senden nung par telok nungia züingsem dena lir, koba tang tagidak lir saka iba senden nung lemetetba indangbo memeteti liasü, ta ashi.

Suu Kyi'er teloki takok ngua aliba November election nung ashikulak mapa inyak, ta tai tonglokja Myanmar mitkartemi sorkar atsüngdok. Iba mapang mitkartemi ashishiba electoral commission-i magizüki liasü.

Mitkartemi tashiyim amshia

sorkar atsüngdokba sülen Myanmar nung nüburtemi longkak aita aruba mapang sepaitemi nisung 800 dak tema tepsetogo, ta Assistance Association for Political Prisoners activist teloki ashir.

Iba den külemi security forces aser ethnic kin telungpur telok den rara tesashiba kumogo.

Iba azüdokshi ajanga Myanmar kidanger linüktem aser alima ajanga aoksatep, saka mitkar lenirtemi democracy busemba telok den tangatetep kati arutsü bilema aliba mesayur.

February 1 nü mitkartemi sorkar atsüngdoktsü ghonda ishika lia Suu Kyi apu aser tang tashi tepuokdak lir aser la anema court ana nung ken o balala benoka lir.

Arishi küm 75 tain Suu Kyi ya la indang okatsürtem den video link ajanga kisüing jembitsü melar saka yangjia sepaitemi repranga atar.

Mitkar anemertemi National Unity Government tenzüka lir, koba atsükshia mapa inyaker. Mitkartem den raratsü atema People's Defence Force amenoker, ta parnoki sangdonga lir.

Japan ya Myanmar nung teyari tulu agütsüba linük ka lir, aser Myanmar nung tensa tajungba mekumra parnoki teyari agütsüba maparen tanaben bilemdangtsü, ta Foreign Minister Toshimitsu Motegi-i Tokyo nungi ashi.



Bangkok, Thailand nung aliba Priest Hospital nung health worker kati Buddhist monk ka nem Sinovac COVID-19 mozü totsüba noksa nung angur. India nung anguba COVID-19 tashidak tapu ya Thailand nunga yangji menatepa aoba mezüngbuba jangjatetogo, ta Hokulbarnü ashi, kong nüburtem nem iba mozü agütsüba maparen yabo taruba ita nungi ang tenzüksü sentong lir.

COVID-19 agi asür aika mezüngsem alitsü: WHO

Monupii/May 21, 2021 (Agencies): COVID-19 tashidak wara agi alima nung nisung asüba indang ketdangsürtemi azüingba nung ano aika mezüngsem alitsü, ta World Health Organization (WHO) ajanga ashir, shirnoki alima nung tang tashinung nisung million trok nungi ti tsüingta sür alitsü akok, ta ashir.

2019 küm tatemlen China nung mezüng poktetba sülen iba tashidak ajanga Hokulbarnü tashinung nisung million 3.4 dak tema süogo, ta züingshir.

Saka kasa anogo WHO ajanga global health statistics report sangdongba nungbo, tashidak wara ya poktetba sülen nisung kanga agi tali süogo, ta ashir.

2020 nung COVID-19 mechi nisung tajemba agi million asem süogo, ta World Health

Statistics report ajanga ngutet, koba ketdangsürtemi bendenba dang million 1.2 shi agi timba liasü.

"Nisung asüba ya ketdangsürtemi bendenba dang ana mesüra asemsü agi timba lir, ta WHO assistant director-general in charge of data, Samira Asma-i osangbener dang ashi.

Tanü iba tashidak wara mechi nisung kwi shi talila süa alitsü, ta asüngdangba mapang, "Kanga junga züingdang nungbo nisung million trok nungi ti tsüingta süa alitsü amai bilemer," ta Asma-i langzü.

Iba tashidak wara agi nisung asüba tali tejangjaba angatetsü atema WHO-i linük balala den külemi inyaker, anungji renema ali tajungba, ta lai ashi.

Asürtem rongnung COVID-19 agi asüba sernung osang

magütsüba aser mozüki peria maliba aser senzüsempongba nung tenokdangba agüja aliba ajanga asürtem dena lir, ta WHO data analyst William Msemburi-i ashi.

"COVID-19 agi asüba osang ya abensa azüingba masü aser timtemji ibaji lir," ta Msemburi-i osangbener dang ashi.

"Nisung tali asüba ajanga asenok nem noksa tajungba agütsür, kechiaser ibaji ajanga asen dak lenmang balala nungi kongshiba sayur," ta pai ashi.

Iba metokmeperi ya tensa aika ajanga lir, aser item rongnung linük aika nung COVID-19 agi asüba osang agütsüba nung anüingba, nisung aika tashidak medendangjungi asüba aser lockdown ozüing benoka aliba mechi tashidak danga agi shirangertema anepalu mesütemi asüba lir.

Israel aser Hamas tsüingta Gaza nung ceasefire alitsü molungtepogo



Gaza City nung taoba hopta Israel sepaitemi tayimtsü amshia amakdang The Associated Press aser danga media tem aliba ki ka nung kongshia iba ki laodaktsür aliba noksa nung angur. Jerusalem nung longkak aita raratepba nungi tenzüka Israel aser Gaza nung Hamas telok tsüingta anogo 11 rara arur Hokulbarnep cease-fire benokogo.

Jerusalem, Monupii/May 21 (Agencies): Anogo 11 raraba sülen Israel aser Haman nati ceasefire sangdongogo, kong Gaza nung Palestine nunger nisung 232 aser Israel nung nisung 12 takum sama.

Linük ana tsüingtai aita Egypt linüki Gaza nung tangatetep aser talenba ka mali rara anena atatsü onük benokba nung Israel security cabinet-i molungsoa Brehostibarnü vote agütsü. Ceasefire ya Hokulbarnep tenzüka liasü.

Iba ceasefire tenzüki Gaza yimti-yimtung nung Palestine nungertem adoka senzü tenzüki. Iba rara nung Israel aser Hamas naprongi takok nguogo

ta jembir. Ceasefire ajanga terenlok atema maongka tejangja agütsür, ta US Tir Joe Biden-ia ashi.

Hokulbarnep 2:00 ako (par mapang) nung ceasefire tenzüki Palestine nunger aika tetsüing agi aser gari nung arua yimtung nung benjongtepa liasü. Gaza nung gari anirtemi gari indang horn agütsü aser mosque nungi loudspeaker ajanga takok nguogo, ta ayima liasü.

Israel mitkartemi linük nung tenokdangba agüja aliba ajanga amai agiener, ta ashi.

Gaza nung yimtsü asür Hamas aser Palestinian Islamic Jihad (PIJ) sepaitemi sangdong ka nung 'tangatetep aser

talenba makai ceasefire' benokba indang metetdaksü.

Linük balalai iba azüdokshi anema ola adokba mapang iba terenlok ya angur, kong US Tir Joe Biden-i Israel Ato Kilonser Benjamin Netanyahu dang rara anentsü merangang ta ajungshi aser ano külen Egypt, Qatar aser United Nations ajanga tetsüingtai aitsü meranga liasü.

Ceasefire onük jembitsü atema Egypt Tir Abdel Fattah el-Sisi-i security delegation telok ana Israel aser occupied Palestinian territory temi aotsü totuyuba agütsü, ta Egyptian state TV ajanga ashi.

Iba rara anenba ya ajanga 2014 küm sülen tesashitiba rara ka anentsü, koba agi Gaza nung ki-o-jen aika raksatsü aser Israel nung nübur sadoksayima melitet.

Yimjung sangdongba ya Netanyahu asoshi tamakok aser Palestine nüburtem asoshi takok lir, ta Arab and Islamic relations bureau nung Hamas züingsem Ali Barakeh-i osangbener dang ashi.

Ghonda ti anena ataba sülen Brehostibarnep Israel-i lungbanga aliba Gaza Strip nung maneni bomb pokloktsü tenzüki aser Hamas o par den sendaktepa aliba PIJ natia rocket khalokja liasü.

May 10 nung iba rara tenzüki sülen tanur 65 aser tetsür 39 densema Palestine

nunger nisung 232 takum samaogo aser ano nisung 1,900 dak tema yiru, ta Gaza nung aliba health ketdangsürtemi ashi. Israel-i Gaza nung sepai 160 shi tepsetogo ta ashir saka kuli tejangja magütsür. Hamas aser PIJ ajanga par züingsem 20 shi tepsetogo, ta ashir.

Hamas-i rocket khaloktsüba mapang Israel nung nisung 12 asü aser noklang aika yiru, ta ketdangsürtemi ashir, kong nüburtem tetsüba agi jenokdang bushia asemtepa liasü.

Sheikh Jarrar nung Palestine nunger kibong kar pei kidang nungi tashiyim agi meindoktsü sentong yangluba ajanga hopta ishika yimti nung tensa mejungi lia arur May 10 nü occupied East Jerusalem nung aliba Al-Aqsa Mosque nung Israel sepaitemi tekülemer anema tashiyim amshiba yong rara ya tenzüka liasü.

Muslim aser Yihudan nunger atema kanga temeshi ta züingshiba Al-Aqsa nungi Israel sepaitem ainshitsü atema Hamas-i mapang latettsüba alema parnok mainshba ajanga Palestine nunger telok yagi Jerusalem tsütsü rocket aika khaloktsü. Mapang tatsüka lir Israel-ia Gaza nung Hamas dak tenük yoker tayimtsü amshia amak tenzüki.

Al-Aqsa Mosque compound

nung Palestine nunger noklang aika Hokulbarnü sarasadem tembanger benjongtepa mapang Israel police tem aita tear gas khaloktsü, ta osang ka ajanga ashi. Saka tang tashi kechi ajanga rongrong ya adokar memetet.

Hokulbarnü ketdangsürtemi Gaza nung ki-o-jen teraksa nungi tanur ka dena Palestine nunger nisung teku tasüing atsütetogo, ta yangji aliba osangbener temi ashi.

Khan Younis yimti northeast tsütsü al-Qarara area nungi pei ki teraksa nungi nisung ti tasüing agitet aser arishi küm asem tetsürchanu ka Gaza City south tsütsü Tal al-Hawa nung lar ki chirepa alidak nungi agitet.

Netanyahu-i Hamas yimsüsür dang ceasefire sülen tarutsü nung rocket agi amaknungbo majungtsü, ta ashi.

Ceasefire tenüker ghonda ishika lir jembiba mapang, "rocket khaloktsüba onoki kecha mashi yutsütsü ta Hamas-i bilemra aji tai," ta Netanyahu-i ashi. Gaza temeket aser Israel nung par nütsüing anema tashiyim yimya amshira jenjang balaka nung tashi amshitsü, ta pai ashi.

Israel-i Gaza nung anogo 11 bomb pokloktsüba ya takok tulu lir, ta Netanyahu-i tenüingsang agüja liasü.

COVID-19 : Jalukie ADC-i tetuyuba agütsür

Peren, Monupii/May 21, 2021 (TYO): Bodhbarnü (19.05.2021) High Powered Committee on COVID-19 ajanga lemtetba nung anidaka, Additional Deputy Commissioner Jalukie, Dr. Tinojongshi Chang-i sangdong ka ajanga, Jalukie Sub-Division telungtet nung tagidak aliba Lockdown ya May 31, 2021 tashi atsülanger aser taoba nung Deputy Commissioner, Peren-i teyuba ama nokdangba/melaba maparen tem iba lockdown mapang maneni anidaksü, ta metetdaksü.

Ajisüaka, nüburtem

chiyongtsü aser nungdakba osettsüset lijaliyongtsü atema, May 22, 2021 (Honibar) nungi tenzüka local grocery store, aonsotsü ayokba tesem, shi/ango ayokba dokan aser hardware store tem anepdang 8:00 ako nungi anüngdang 12:00 ako tashi lapoktsü melar.

Iba den bendenloksema, ADC-isa, lokti adenshiba tesem/sentong nungi pilar alitsü, kima - yimdong nung senzüdang tejak nembangba mask inoktsü aser Jalukie Sub-Division nung alir ajak dang Covid-19 temzüng nung anidaksü tetuyuba agütsüogo.

Enforcement committee tem aser police densema village/ward tekolakpur ajak dang pei pei tata tesem nung nübör dang Covid-19 temzüng nung anidaksü asoshi ozüing takang agütsütsüla ta ADC-i tetuyuba agütsü.

Anüngji, iba tetuyuba dak sendakba nung nisung kari dang aibelenba putetra, IPC indang Section-188 küböker merenshiba dak alaka, Disaster Management Act, 2005 indang Section-51 nungi 60 nung agüja aliba tashi amshia temerenshi tapet agütsütsü, ta kasa sangdong nung shia lir.

Maharashtra küböker Gadchiroli nung Maoists telungpur 13 khaset

Mumbai, May 21 (Agencies): Hokolbar anepdang Maharashtra küböker Gadchiroli district nung state police C-60 commando temi Maoists telungpur 13 khasetogo.

Hokolbar nep 5:30 ako meta dictrict küböker Kotmi nung aliba arem nung Maoists telungpurtem senden amentsü atema adenshia aliba tesem

nung rara tenzüker, ta Gadchiroli district Deputy Inspector General, Sandeep Patil-i metetdaksü.

Sandip Patil-i, "Intelligence osang ajanga lazükba nung ajemdaker C-60 commandos leniba nung police-i arem nung telungpurtem mita ao, ajisüaka telungpurtemi police anguba sülen parnoki tama injang

khaloktsüba nungi rara tenzüker, aser telungpur 13 khaset," ta metetdaksü.

"Ghonda ka shi khatapba sülen telungpurtem jena ao. Tesülen raraba tesem nungi telungpurtem tasü mang angu aser police-i maneni telungpur mita odar," ta Superintendent of Police, Gadchiroli, Ankit Goyal-i metetdaksü.

Asia nung takatiba rongnung Gautam Adani tanabuba kümogo



New Delhi, Monupii/May 21, 2021 (Agencies): Asia nung takatiba rongnung tanabuba akümtsü asoshi India nung businessman Gautam Adani-i China nung billionaire Zong Shanshan ajatetogo, ta Bloomberg Billionaires Index sangdong ka ajanga metetdaksü.

Iba index ajanga angazükba agi, tang Adani Group indang net worth ji \$66.5 billion aser Zhong Shanshan indang net worth ji \$63.6 billion alitsü. Kasa mapang, Asia nung rongsen timtiba alir rongnung Adani ya külem India nung aser Reliance Industries Limited (RIL) Chairman Mukesh Ambani tesülen lir.

Asia nung takatiba akümtsü atema taküm February ita Ambani-i Shanshan ajateta liasü. India nung takatiba rongnunga RIL indang Chairman Mukesh mezüng alitsü.

Nongfu Spring ngutetsang aser chairman Shanshan, shiba Beijing Wantai Biological Pharmacy Enterprise indang shilem timba madak kibur lir, pa mapang ka alima nung takatiba rongnung trokbuba liasü. Ajisüaka, tesüiba ita ishika nung pa indang 'net worth' ajema

kümadok.

Tang, Bloomberg indang global billionaires' list nung Ambani aser Adani na jenjang 13buba aser 14buba tongteta lir. Tesüiba küm nung Adani indang 'net worth' \$32.7 billion tashi atu, kasa mapang Ambani indang net worth \$175.5 million agi ajema aküm, ta index sangdong nung shia lir.

Ambani indang net worth' \$76.5 billion alitsü.

1980s mapang, osettsüset shishilembar ka ama inyak tenzüka sülen, küm 20 nung Gautam Adani-i mine, port aser power plant nungi airport, data centre, city gas aser defence wadang tsütsü ayimjema inyakogo. April ita India küböker market capitalization nung \$100 billion ajangeter telok rongnung Adani Group tasembuba aküm.

Tesüiba küm ana nung Adani indang teloki airport tenet aser India indang air traffic shilem pezü nung shilem ka achaayanga arudar. Ano külen, par teloki renewable energy capacity bendenlokba nung renloka aoba den Sri Lanka nung port terminal ka yanglutsü asoshi contract angu aser India nung port tem alizük.

Adani Ports yagi India

indang port industry shilem 30 tashi achaayanger aser renewable energy den city gas distribution business tsütsü France indang energy company tetsüti - Total den longjemer inyakker, ta sangdong nung shia lir.

2025 küm tashi nung Adani Green-i 25 gigawatts - renewable capacity ajangzüktsü nükjiding yur inyakdar.

Bodhbarnü, Adani Green Energy Limited-i ashiba agi, regulatory nung shia aliba ama \$3.5 billion indang enterprise evaluation (EV) ajunga atema SB Energy India nungi 5 GW indang renewable power portfolio agizüka lir. SB Energy India ya Japan-based SoftBank Group Corp aser Bharti Group na den longjemer inyakba mapatong ka, shirnoki 80 per cent aser 20 per cent stake bena lir.

India nung renewable energy sector tsütsü iba inyakyim ya tulutiba ama sayur, ta Adani Green Energy Limited-i metetdaksü.

"Iba portfolio nükjiding nung large scale utility assets - 84% solar capacity (4,180 MW), 9% wind-solar hybrid capacity (450 MW) aser 7% wind capacity (324 MW) dena lir," ta regulatory nung shia lir.

Iba portfolio nung 1,400 MW operational solar power capacity dena lir aser 3,554 MW ka teyangludak lir. Project ajak küm 25 tashi sovereign rated counterparties talisa Solar Energy Corporation of India Ltd. (SECI), NTPC Limited aser NHPC Limited den PPAs (Power Purchase Agreement) yanglua lir," ta kasa sangdong ajanga metetdaksü.

Tepela Lemsateper

Tsürapur akümüli wadang tempanga iba lima nungi pilar asüku nung alidang kija, kibong aser lokti shirnokisa nübu, rongsen aser sarasadem ajanga yaritepoko, nenok ajak dang iba osep ajanga pelaba lemsateper.

Temeim Chirnur, kinunger aser semchirtem



Late. O. Supongmar Anichar 23-4-1939 to 19-5-2021

Olga aser Michael den Bruce longjemtsü

Monupii/May 21, 2021 (Agencies): Taruba project - 'White Elephant' nung Olga Kurylenko aser Michael Rooker na den Bruce Willis anisemogo.

Jesse V. Johnson-i zülua aser direct asütsü aliba action-thriller nung par asem yagi tongti shilem agiba angütsü.

Iba film atema Erik Martinez den Jesse longjemer screenplay zülutsüogo. Georgia nung iba film tangokdar. '308 Enterprises' atema BondIt Media Capital den Corey Large longjemer senotsü tsütsü nungittsü.

Tawa, Bruce-i 'The Fortress' trilogy nung adenba osang ajanga angazükogo.


Iba film series nung arishi, küm 66 tain actor Bruce-i Jesse Metcalfe aser Chad Michael Murray na den

longjemtsü. Kasa mapang, Cullen Bressack-i iba trilogy direct asütsü.

Puerto Rico nung 'The Fortress' indang mezüng installment maparen tenzükerogo aser iba film tangoker sülen sequel tangok tenzükerogo sentong lir. Ajisüaka, installment tasembuba ya taruba küm ang tangoktsü.

'The Fortress' atema Randall Emmett aser Emile Hirsch nati maparen achaayangdar aser Alan Horsnail-i script zülutsüogo. Mezüng movie ana ya Emmett aser George Furla; Luillo Ruiz aser Chad A. Verdi nungeri yanglutsü. Kasa mapang, iba project atema Tim Sullivan, Nick D'Angelo, Caesar Richbow aser Danny nung executive producer ama inyaktsü.

Anne Marie-i 'Therapy' kensep saya



Monupii/May 21, 2021 (Agencies): Kentener aser ken zülur British tsür Anne-Marie-i 'Therapy' ta nungja agütsüba kensep tasen ka sayaogo.

Hokolbarnü (21.05.2021) arishi küm 30 tain pop star Anne-isa kanga dang yongya ataba - Niall Horan duet 'Our Song' sayaa liasü aser 2018 küm la indang mezüng record 'Speak Your Mind' den tatongtep atema osang metetdaksü, koba July 23, 2021 nü lai iba kensep sayatsü terenemba lir.

Anne indang taruba ken collection indang track-list ajunga mapang tongi metetdaksütsü, kong 'Our

Song' aser Anne-Marie indang singles 'Don't Play' (KSI den) aser; Nathan Dawe aser MoStack den atenba Digital Farm Animals aser 'Way Too Long' dena lir.

Iba kensep atema Max Martin, Kamille, MNEK, Raye, Ed Sheeran aser tanga artist balala teyari agiogo.

'Perfect To Me' ken atenla Anne-i, Covid-19 tensa mejungi akümba mapang ka nung iba record atema ken züluba ajanga shisatsü nung teyari anguba indang lemsatepa liasü.

Anne-Marie-i, "Kensep tasen 'Therapy' sayatsü maongka anguba atema pelar. Iba kensep ya asenok ajak atema yanglu," ta ashi.

U-17 Women's World Cup India nung asayatsü: FIFA

New Delhi, Monupii/May 21, 2021 (Agencies): U-17 women's World Cup asayamung ya sangküm (2022) October 11 nungi 30 tashi India nung asayatsü, ta FIFA Council-i ashi.

Taoba mapang India-i 2020 U-17 World Cup asayamung ayongzüksü renem, saka alima ajunga asungba Covid-19 wara ajanga athitsü telemetba magidang, 2021 nung asayatsü atema anogo atsülangtsü.

Iba sülen, FIFA-i taoba küm November ita 2022 edition ayongzüksü asoshi India nem 'hosting rights' agütsü.

71 buba FIFA Congress atongtsü anogo ka lia, India nung 2022 U-17 World Cup asayatsü anogo densema international match calendar atema anogotem FIFA Council-i melaogo.

"Council-isa FIFA U-17 Women's World Cup India 2022 (11-30 October 2022), FIFA U-20 Women's World

Cup Costa Rica 2022 (10-28 August 2022) den külemi taküm June 19 aser 25 tsüingda FIFA Arab Cup 2021 atema 14-team play-off dak sendakba nung anogotem latetsüogo," ta FIFA sangdong ka ajanga metetdaksü.

Kasa mapang, FIFA Council-i July 20 nungi August 20, 2023 tashi Women's World Cup Australia aser New Zealand 2023 atema asaya anogotem agütsüogo.

"Women's World Cup 2023 atema play-off tournament tassenba ya February 17 nungi 23, 2023 tashi asayatsü," ta kasa sangdong nung shia lir.

Maneni, FIFA-i Australia aser New Zealand nung 2023 Women's World Cup atema anogotem sangdongogo. Iba asayamung ya July 20 nungi August 20, 2023 tashi asayatsü. 2023 tetsür Football World Cup nung team 24 melen team 32 agi shilem agiba angutsü aser stadium 10 nung

iba asayamung ayongzüksü.

Iba inter-confederation playoffs tassen, kong qualification spot tatemba asem atema lemtetsü, iba playoffs ya kasa küm February 17 nungi 23, 2021 tashi asayatsü, ta FIFA-i ashi.

Auckland kübok Eden Park nung 2023 World Cup tenzüka asayatsü aser Sydney indang Stadium Australia nung final asayatsü.

Australia nung Melbourne, Brisbane, Adelaide aser Perth yimitem; aser New Zealand kübok Dunedin, Hamilton aser Wellington nung team 32 tashi tokteptsü, koba tetsür Football World Cup putiotsü nung mezüing alitsü.

Australia aser New Zealand nung semi final ka ka asayatsü aser iba asayamung atema taküm küm tatemlen schedule sangdongtsü. Pezüben tashi World Cup takok angur telok United States-i taoba World Cup koka lir.

India-New Zealand WTC final atema terepranger 4000 melatsü



Southampton, Monupii/May 21, 2021 (Agencies): India aser New Zealand tsüingda Southampton nung World Test Championship final asaya atema terepranger 4000 matsüingdang ayongzüksü, ta Hampshire County Club head Rod Bransgrove-i ashi.

UK nung The COVID-19 tensa tajungba kumdaki aser Ageas Bowl nung Leicestershire aser Hampshire na tsüingda asaya reprangtsü asoshi terepranger 1500 shi melaogo. Kasa tesem (Ageas Bowl) nung June 18, 2021 nungi WTC final asayatsü renema lir.

"Tanü nungi tenzüka anogo pezü county game' ayonga asayatsü aser September 2019 nungi shir England nung Cricket asaya reprangtsü asoshi terepranger melaba ya mezüing alitsü. Tanga county asayatem asünung nungi tenzüksü aser item asaya ajak nung

tereprangertem melatsü," ta Bodhbarnü Hampshire County Club nung tekolak, Rod Bransgrove-i Cricbuzz dang ashi.

Kanga dang yongya ataba asayamung (WTC final) atema England and Wales Cricket Board (ECB) aser ICC nati terepranger "4000" melatsü lemtetogo," ta Bransgrove-i ashi.

Tang, Mumbai nung India team hopta ana atema quarantine asütsü aser June 02, 2021 nü parnok UK-i ayamesoa aotsü.

England tongli, Virat Kohli aser par team pur Southampton nung anogo 10 quarantine asütsü, saka iba mapang parnok training agidaksütsü imlar.

"India team pur quarantine temer sülen England-i arutsü asoshi onoki atadar. Parnok atema iba asayamung ayongzüksü terenemba lir," ta Bransgrove-i shisem.

Boxing coach OP Bhardwaj alima nungi pilaogo



New Delhi, Monupii/May 21, 2021 (Agencies): Boxing nung India indang mezüing Dronacharya award takok angur coach, OP Bhardwaj, mapang talangka shiranga arur sülen pa arishi küm agi tonger, Hokolbarnü New Delhi nung asü.

Bhardwaj arishi küm 82 liasü aser tesüiba anogo 10 tejakdang pa kinungtsü Santosh-a shiranga asü. Bhalchandra Bhaskar Bhagwat (wrestling) aser OM Nambiar (athletics), 1985 küm tenzüka mapang, iba tentet anaprongla nung coach inyakba atema Bhardwaj nem national award tematiba agütsü.

"Temang nung timtem balala aliba den anogo aika pa shirang aser mozüki nung munga liasü. Pa arishi küm nunga kanga tain liasü aser tesüiba anogo 10 nung pa kinungtsü asüba osang angashia pa kanga dang aoksadok," ta Bhardwaj'er medemer aser taoba boxing coach T L Gupta-i ashi.

1968 nungi 1989 küm tashi Bhardwaj-i India indang

national boxing coach inyaka liasü aser national selector ama tenzüko. Pa lenisüba kübok, Asian Games, Commonwealth Games aser South Asian Games nung Indian pugilist temi medal nguogo.

Indian boxing nung mezüingpur, Bhardwaj-i Patiala kübok National Institute of Sports India nung iba saisapong atema mezüing chief instructor inyaka liasü.

"Pune kübok Army School of Physical Training nung Bhardwaj career tenzüker aser Services atema pa coach tajung ka aküm. 1975 küm, boxing nung coaching diploma agütsütsü atema NIS sentong tem renemba mapang, iba mapatong tenzüksü asoshi Mr Bhardwaj shima liasü," ta Gupta-i ashi.

"Diploma atema student mezüingpur rongnung ni dena liasü aser iba atema nümatanga bilemer. Pa sempet ajanga aika ajungshiogo," ta Gupta-i shisem.

2008 küm, ita ishika atema Bhardwaj-i Congress MP Rahul Gandhi dang boxing

asaya yimya kar sayuogo. Taoba mapang national coach Gurbax Singh Sandhu, shiba NIS nung student mezüingpur rongnung dena liasü, pai ashiba agi, Chennai nungi Bhardwaj ya tebang agi masü saka mapa agi inyaka sayuba tesayur ka liasü.

"Tembar tajung ka ama Bhardwaj den tebilemba aser shisatsü lemsatapa aru. NIS nung dener sülen, ni pa indang student ka ama aser külemi inyaka liasü. Indian boxing renloka aotsü asoshi pai shilem tuluka agiba ni nguogo," ta Sandhu-i ashi.

"Onoki matongba nung pai teti tesayuba agüja nungita liasü. Training mapang, pai kodanga nokdaker tebang agi mejembi saka onok den külemi asemtepa mapa agi tesayuba agütsü. Jembitsü melen mapa agi inyaka sayutsü asoshi pa dang nungi angazük. Pa asüba osang angashi temulung züreper," ta pai shisem.

Taoba mapang, national federation secretary general Brigadier (Retd) PKM Raja-i, iba saisapong tsütsü Bhardwaj-i bendanga agüja shilem agiba atema ajaki pa akümtsüba liasü, ta ashi.

"Bhardwaj ya Services Sports Control Board nung nübu takotet ka liasü. Sempet tajung aketba coach aser ajaki sapuba nisung tajung ka liasü. Ajisüaka, tesüiba küm ishika nungi pa temang nung timtem balala aliba ajanga pai bilemba aika meinyaktet," ta pai ashi.

BNP Paribas Open October nung ayongzüksü

New Delhi, Monupii/May 21, 2021 (Agencies): Indian Wells, California nung BNP Paribas Open tennis asayamung, koba March ita asayatsü renem, iba asayamung taküm October ita asayatsü, ta ATP-i metetdaksü.

ATP aser WTA hardcourt asayamung anaprongla March 8 nungi 21, 2021 tashi asayatsü renem saka, COVID-19 wara süshia maoba dak sendakba nung tebilemsü adokba ajanga, küm ana tashi atonga iba asayamung mapang shitak nung masayateter.

Grand Slams pezübuba sülen tongtibang asayamung rongnung pungobuba ama ayongba 2020 Masters 1000 tournament ya taoba küm United States nung Covid-19 tensa ajanga thitemtsüba tongtibang asayamung rongnung Paribas alitsü.

"2020 küm August ita nung iba Tour tenzüksüshir külen nungi, asayamung tem akok tashi timba ayongzüksü nükjidong

nung onoki asalentong balala yangluogo," ta ATP chairman Andrea Gaudenzi-i ashi.

Tesüiba küm ana tashi BNP Paribas Open asayatsü atema iba saisapong nung dena alir ajaki yongya aruogo aser taküm October iba asayamung ayongtsü maongka ngutetba ya tennis wadang atema tuluka asütsü.

"Tennis calendar nung asayamung aika sendaktepa lir aser saisapong rangben ajangzüksü atema onoki lenmang bushiba mapang amalitepa inyakba asoshi iba season nung dena aliba asayamung ajak dang pelar," ta Andrea-i ashi.

October nung iba asayamung ajanga Beijing, Tokyo aser Shanghai nung asayatsü aliba Asian asayamung nung tetsükdaksü adokdaksütsü akok.

Toba Indian Wells asayamung nung Dominic Thiem aser Bianca Andreescu nati tebur aser tetsür title bena lir.

BILEMDANGANG

"Temoatsü aser tepela nung dangbo taküm ji malir."